



FOTO RALPH FEINER/52BESTEBAUTEN.CH

La baselgia amez il boom

(fmr/lr) En ils onns 1950 e 1960, onns d'in enorm boom economic e dad in considerabel augment da la populaziun, èn vegnidas construidas en Svizra bleras novas baselgias. En la cultura da bajegiar vegniva discutà vivamain davart l'architettura sacrala, la quala vuleva era rumper cun las furmas tradiziunals da nav e chor. L'onn 1948 era p. ex. vegnida bajegiada la gronda «Markuskirche» a Turitg en furma dad octogon. Quella ha alura servì sco model

per la baselgia reformada da Comander a Cuir, eregida 1956/57 tenor plans da Cyrill A. von Planta (1906–2000). Questa baselgia è ina perditga da l'architettura grischuna dals onns 1950 – ina variaziun conservativa da la moderna.

La baselgia è vegnida plazzada cun leva distanza dal transit en la Ringstrasse, uschia ch'i para ch'ella sa chattia en in pitschen parc. En l'intern è stada l'intenziun dad unir la raspada ed avischinar ella a la chanzla ed

a l'altar, ils centers da la liturgia. Tras ils vaiders blaus e cotschens da las fanestras marcantas blauas e cotschnas entra ina glisch decenta – quai che sustegna la tempr calma da la sala.

La baselgia reformada da Comander è in dals edifizis che la Lia grischuna per la protecziun da la patria preschenta emna per emna durant il 2020. Cun quell'acziun vul l'uniun sensibilisar per la ierta architectonica dals onns 1950–2000.